



Masjid Sebagai Alternatif Penjanaan Ekonomi Masyarakat Setempat

MOHAMAD BAZLI BIN MD RADZI^{1, a}, MOHAMAD FIRDAUS BIN MOHAMAD SABARI^{2, b} and
HADENAN BIN TAWPEK^{3, c}

¹ Universiti Teknologi MARA, Sarawak Branch, Malaysia

² Universiti Teknologi MARA, Sarawak Branch, Malaysia

³Universiti Teknologi MARA, Sarawak Branch, Malaysia

^amdbazli@uitm.edu.my, ^bfirdaussabari@uitm.edu.my

& ^chadenan298@uitm.edu.my

Abstrak

Masjid merupakan syiar dalam Islam. Dalam lipatan sejarah menunjukkan masjid mempunyai peranan yang sangat penting dalam sesebuah peradaban di mana masjid menjadi nadi utama dalam sesebuah masyarakat. Ini dapat digambarkan melalui peristiwa hijrah baginda nabi SAW di mana baginda bersama dengan para sahabat membina masjid Quba. Masjid merupakan tempat pemusatan aktiviti dan pertemuan masyarakat bagi membincangkan serta menguruskan perihwal yang berkaitan dengan syiar Islam. Di samping berperanan sebagai tempat pelaksanaan ibadah, masjid memainkan peranan yang luas mencakupi aspek pendidikan, pentadbiran, politik, sosial dan ekonomi. Justeru itu, artikel ini akan membahaskan fokus terhadap peranan masjid sebagai alternatif penjanaan ekonomi ummah. Bagi mencapai objektif pelaksanaan kajian, kaedah kualitatif melalui analisis kandungan digunakan. Dapatan kajian menunjukkan bahawa masjid mempunyai peranan yang signifikan sebagai alternatif penjanaan ekonomi masyarakat setempat. Ini dapat dibuktikan melalui pelaksanaan aktiviti berupa penjanaan ekonomi oleh beberapa bilangan masjid di Malaysia yang boleh dijadikan sebagai contoh bagi pelaksanaan aktiviti perekonomian berpusatkan masjid.

Kata kunci: Peranan masjid, penjanaan ekonomi masyarakat

1. Pendahuluan

Menurut Muhammad Ibrahim (1967), perkataan masjid dan jamik adalah dua perkataan yang biasa digabungkan. Apa yang dapat digambarkan melalui dua perkataan itu ialah menjurus kepada fungsi masjid iaitu memainkan peranan sebagai medium tempat berhimpunnya masyarakat Islam untuk melaksanakan solat jumaat dan solat secara berjemaah. Di samping itu, menurut (Syauqi, 2004) istilah perkataan masjid berasal daripada bahasa arab yang bersandarkan kepada perkataan *sajada*, *yasjudu*, *sajdan*. Istilah perkataan *sajada* membawa maksud bersujud, taat serta patuh dan tunduk dengan penuh hormat. Masjid merupakan sebuah institusi yang utama dan penting dalam perkembangan awal masyarakat dan peradaban Islam. Ini boleh dilihat ketika baginda nabi SAW bersama dengan para sahabat berhijrah ke Madinah, antara perkara yang dititikberatkan oleh baginda nabi SAW ialah berkaitan dengan masjid. Baginda mendirikan masjid Quba setelah berhijrah ke kota Madinah. Ini menunjukkan bahawa masjid mempunyai peranan yang sangat signifikan dalam menegakkan syiar Islam dan merupakan asas pertama dan utama ke arah pembentukan masyarakat Islam (Ab. Halim, 2021).

Namun demikian, realitinya, terdapat dikalangan masyarakat melihat masjid sebagai tempat pelaksanaan ibadah khusus yang berkaitan dengan kerohanian dalam kehidupan seharian. Sudut pandang dan persepsi sedemikian perlu dimurnikan agar peranan dan fungsi sebenar yang dimainkan oleh masjid dapat difahami dan dihayati. Ini kerana masjid mempunyai peranan yang lebih luas mencakupi pelbagai aspek iaitu pendidikan, pentadbiran, perekonomian dan pelbagai lagi. Sehubungan itu, di dalam artikel ini akan membincangkan dan memberi penekanan terhadap peranan masjid sebagai alternatif penjanaan ekonomi masyarakat setempat. Antara perkara yang akan dijelaskan adalah berkenaan peranan masjid ketika zaman Rasulullah SAW dan para sahabat serta bentuk aktiviti yang bercirikan perekonomian yang dilaksanakan oleh masjid.

2. Peranan Masjid Zaman Rasulullah dan Para Sahabat

Kegemilangan tamadun Islam amat berkait rapat dengan masjid. Ini kerana masjid memainkan peranan yang sangat signifikan dalam memartabatkan masyarakat dalam segenap aspek kehidupan. Masjid ketika zaman Rasulullah SAW telah dijadikan tempat bagi pelaksanaan aktiviti masyarakat. Segala urusan berkaitan persoalan, perselisihan, strategi pentadbiran dan ketenteraan, musyawarah dan pusat pertemuan kesemuanya diadakan di masjid. Masjid ketika itu merupakan nadi dan pusat kegiatan aktiviti kemasyarakatan. Menurut Asmak (2008) Antara peranan yang dimainkan oleh masjid ketika zaman Rasulullah SAW ialah:



1. Pusat Pelaksanaan Ibadah

Rasulullah SAW bersama para sahabat mendirikan solat secara berjemaah sebaik sahaja selesai pembinaan masjid di madinah. Ini menunjukkan bahawa masjid dijadikan sebagai tempat berkumpul bagi melaksanakan ibadah khususnya berkaitan dengan solat fardhu. Melalui pelaksanaan solat secara berjemaah memberi kesan terhadap perpaduan dan ukhuwah dikalangan masyarakat Islam. Rasulullah SAW amat memberi penekanan terhadap pelaksanaan solat secara berjemaah melalui tauladan yang ditunjukkan oleh baginda. Baginda sendiri yang akan mengimamkan solat bersama dengan para sahabat.

2. Pusat Pengembangan Ilmu dan Dakwah

Bagi melahirkan sebuah masyarakat yang madani, antara elemen yang dititikberatkan oleh baginda nabi SAW adalah berkaitan dengan ilmu pengetahuan. Masjid dijadikan sebagai pusat pengajaran dan pembelajaran berkaitan dengan ilmu fardhu ain dan fardhu kifayah. Bagi memperkasakan masyarakat, penerapan dan penghatan berkaitan ilmu adalah perkara yang amat perlu dititikberatkan. Melalui ilmu masyarakat akan terhindar dari amalan-amalan yang menyimpang dari ajaran agama.

3. Pusat Kegiatan Aktiviti Sosial

Dari aspek sosial, Rasulullah SAW dan para sahabat menjadikan masjid sebagai dewan syura umat Islam, pusat kebajikan, aktiviti sosial, rumah persinggahan, hospital dan markas tentera. Ini jelas menunjukkan pelaksanaan aktiviti sosial adalah berpusat di masjid. Urusan berkaitan zakat, *ghanimah* dan *fai* turut dilaksanakan di masjid. Di samping itu, baginda nabi SAW juga pernah melaksanakan majlis pernikahan dan pengisyrigharan perkahwinan di masjid. Selain itu, masjid juga menjadi rumah persinggahan kepada mereka yang memerlukan. Terdapat juga golongan asnaf miskin yang tinggal di suffah masjid. Suffah merupakan satu ruang yang disediakan sebagai tempat tinggal yang berada di masjid.

4. Pusat Pemerintahan dan Politik

Semasa era baginda nabi SAW dan sahabat, masjid juga dijadikan sebagai pejabat ketua negara, rumah tetamu, mahkamah dan tempat tawanan perang. Segenap aspek perkara dan elemen dalam kehidupan tidak dapat dipisahkan dengan Islam. Islam merupakan cara hidup yang lengkap yang mencakupi setiap aspek kehidupan. Sehubungan itu, segala urusan berkaitan pentadbiran dan politik adalah berpusatkan masjid. Ketika era khulafa al-rashidin juga, peranan masjid dari aspek pemerintahan diteruskan lagi dengan melaksanakan urusan pentadbiran dan pemerintahan dengan sebaiknya yang berpusat di masjid.

5. Pusat Perekonomian Masyarakat

Masjid merupakan pusat perbendaharaan negara pada zaman Nabi SAW yang berpusat di masjid Nabawi. Antara peranannya ialah berkaitan pengumpulan dan agihan harta. Ketika zaman Saidina Abu Bakar, peranan baitulmal dikembangkan sebagai pusat agihan zakat. Kutipan zakat yang diperolehi diagihkan kesemuanya bagi meningkatkan kuasa membeli masyarakat Islam. Ketika zaman Saidina Umar, beliau tidak menghabiskan dana baitulmal secara sekaligus rentetan daripada pertambahan pendapatan negara. Peranan baitulmal pada ketika itu diperluas kepada beberapa jabatan. (Khurun & Mohamad, 2019). Di samping itu, Rasulullah juga mewujudkan pasar (*suq*) Islam di Madinah yang berdekatan dengan masjid nabi SAW. Fungsi masjid sebagai pusat perekonomian masyarakat dapat ditunjukkan melalui kewujudan premis-premis perniagaan dan aktiviti-aktiviti ekonomi yang dilaksanakan berhampiran masjid Quba, masjid Nabawi dan Masjidilharam. (Amru, 2015).

3. Peranan Masjid Dalam Penjanaan Ekonomi Masyarakat Setempat

Bagi membantu perkembangan ekonomi masyarakat, masjid dilihat mempunyai peranan yang signifikan dalam membantu golongan yang memerlukan terutamanya golongan asnaf fakir dan miskin. Masjid yang lokasinya sangat strategik yang berada di lokaliti masyarakat merupakan sebuah insitusi yang ideal bagi pelaksanaan aktiviti kemasyarakatan. Implikasi dari pelaksanaan aktiviti bercirikan perekonomian adalah bertujuan untuk membantu memperkasa ekonomi masyarakat Islam terutamanya golongan yang memerlukan. Masjid merupakan sebuah institusi peneraju syiar Islam bermula pada zaman Nabi SAW yang memainkan peranan yang luas mencakupi elemen perekonomian yang mampu untuk membantu masyarakat setempat menjana pendapatan khususnya golongan yang



memerlukan. Bagi memaksimumkan fungsi dan peranan masjid dari aspek perekonomian, terdapat beberapa bentuk aktiviti yang boleh dilaksanakan oleh pihak pengurusan masjid.

Di Malaysia, pelaksanaan ekonomi berpusatkan masjid hanya dilaksanakan oleh beberapa masjid. Sebagai contoh Masjid Al-Azim, Pandan indah menyediakan koperasi kariah masjid bagi menjana ekonomi ahli yang terlibat di samping bagi tujuan amal jariah. Antara bentuk aktiviti yang dilaksanakan melalui koperasi kariah masjid ialah perkhidmatan mencuci kereta, penjualan produk seperti air minuman, produk samak dan sertu, pelupusan al-quran, kedai runcit hub halal, pembekal lembu dan daging mentah dan pemborong beras. Sementara itu, negara-negara luar seperti tetangga kita di Indonesia turut mengoptimumkan peranan masjid dalam melaksanakan kegiatan ekonomi sosial yang berpusatkan masjid. Antaranya ialah kaedah yang digunakan oleh Masjid Ummul Mu'minin, Surabaya bagi membantu masyarakat ialah melalui pemberian bantuan modal bagi melaksanakan perniagaan. Bantuan yang diberikan adalah bersandarkan kepada kekurangan modal atau dana bagi melaksanakan perniagaan dan mengelakkan daripada terlibat dengan pinjaman berunsurkan riba. (Rb Dandy et.al, 2018)

Di samping itu, konsep perniagaan sosial seperti aktiviti ekonomi asas seperti penyewaan lot-lot kedai, rumah sewa, tapak menara telekomunikasi, khemah dan peralatan kenduri-kendara, sewa dewan, sewa bilik kuliah dan perniagaan homestay merupakan sebahagian aktiviti pengimarah masjid. Keuntungan yang diperolehi dapat dimanfaatkan oleh golongan yang memerlukan & juga institusi masjid. (Ahmad Rafli, Mohd Yahya, Fidlizan, 2017). Dapatan kajian menunjukkan bahawa dana yang terkumpul di masjid adalah fokus kepada pembangunan dan pengoperasian masjid. Oleh yang demikian, satu model berkaitan pengurusan keusahawanan yang telah dirangka boleh dilaksanakan oleh jawatankuasa masjid bagi memperkasa fungsi masjid dalam menjana ekonomi masyarakat setempat di bandar Langsa, Indonesia (Zulkarnaen, Dias, & Bustami 2019).

Bagi memperkasakan lagi aktiviti perekonomian masjid, penubuhan Konsortium Koperasi Kariah Masjid bukan sahaja berperanan dalam meneroka bidang perniagaan, tetapi menjadi platform untuk mendapatkan bekalan dan lesen mengimport barangan termasuk memasarkan produk masyarakat tempatan ke luar negara & dapat membantu koperasi kariah masjid digabungkan bagi menjalankan urus niaga berskala besar. (HM, 2015). Masjid Ainul Yaqin memainkan peranan sebagai pusat membangunkan semula penternakan lembu di Lombok Tengah, Indonesia. Di masjid itu juga diwujudkan sebuah Institusi Pemerikasaan Komuniti Bersepadu. Impak kepada masyarakat ialah, meningkatkan pengetahuan dan kemahiran masyarakat berkaitan pengurusan penternakan lembu. Pengurusan Masjid Al-Ikhlas telah menubuhkan Baitul Maal Al-Ikhlas bertujuan untuk menguruskan urusan berkaitan penyaluran zakat, infaq dan sadaqah.

Antara bentuk bantuan yang diberikan oleh Baitul Maal Al-Ikhlas ialah:

1. Memberikan pinjaman modal kepada peniaga yang memerlukan.
2. Memberikan pinjaman untuk pendidikan
3. Memberi bantuan bahan keperluan makanan asas (sembako)
4. Memberi bantuan pinjaman untuk orang sakit. (Abdurrahman, Idaul & Rahmad, 2019)

Melihat kepada pelaksanaan aktiviti bercirikan perekonomian yang dilaksanakan di beberapa buah masjid di dalam dan luar negara menunjukkan bahawa masjid mampu berperanan dalam membantu meningkatkan ekonomi masyarakat setempat. Melalui pelaksanaan aktiviti berupa perekonomian ini dapat membantu golongan yang memerlukan seperti asnaf fakir dan miskin untuk berdikari menjana pendapatan mereka sendiri. Di samping itu, antara impak kepada pelaksanaan ialah akan dapat memperkasa ekonomi dan modal insan masyarakat setempat ke arah yang lebih baik.

4. Kesimpulan

Secara kesimpulannya, di samping memainkan peranan sebagai tempat pelaksanaan ibadah rohani, masjid mempunyai peranan yang sangat luas sebagaimana yang telah ditunjukkan oleh Rasulullah SAW dan para sahabat. Peranan yang dimainkan oleh masjid dapat memberi impak yang besar terhadap masyarakat setempat melalui penganjuran aktiviti yang dilakukan oleh jawatankuasa pengurusan masjid. Sehubungan itu, bagi mengoptimumkan peranan dan fungsi masjid, maka ahli jawatankuasa hendaklah memainkan peranan yang penting dalam meletakkan peranan masjid pada tempatnya. Adalah diharapkan melalui penulisan ini dapat memberi sedikit sebanyak pengetahuan kepada masyarakat berkenaan peranan masjid yang lebih menyeluruh untuk manfaat dan kebaikan masyarakat Islam.



Rujukan

- Ab. Halim Tamuri. (2021). Konsep Pelaksanaan Fungsi Masjid dalam Memartabatkan Masyarakat. *Al-Mimbar: International Journal of Mosque, Zakat And Waqaf Management*, Vol.1.
- Abdurrahman. (2018). Revitalisasi Peran Masjid dalam Pemberdayaan Ekonomi Umat: Studi di Masjid Al-Ikhlas Jl. Raya Langsep 21 A Kota Malang. Degree Dissertation. Universitas Muhammadiyah Malang
- Ahmad Rafli Che Omar, Mohd Yahya Mohd Hussin & Fidlizan Muhammad. (2017). Perniagaan Sosial Menerusi Aktiviti Ekonomi Masjid. *Journal of Global Business and Social Entrepreneurship*. Vol. 1: no.1. 39–46.
- Asmak Haji Ali Cik Hashim Mat Said. (2008). (Mustari, M.I., & Jasmi, K.A.). Fungsi dan peranan masjid dalam masyarakat Hadhari.
- Harian Metro. (2015, November). RM1j modal Konsortium Koperasi Kariah Masjid. Retrieved from <https://www.hmetro.com.my/mutakhir/2015/11/90029/rm1j-modal-konsortium-koperasi-kariah-masjid>
- Muhammad Ibrahim. 1967. *Al-Jannati, al-Masajid wa Ahkamuha fi al-Tasyri al-Islami*. Al-Najaf, Iraq: Mathbacad al-Qada.
- RB Dandy Raga Utama, Zavirani Fitrandasari, Moh. Arifin & Ridan Muhtadi. (2018). Can Mosque Fund Management for Community Economic Empowerment Ekonomi? : an Exploratory Study. *InternationalJurnalofIslamic Business Ethics(IJIBE)* Vol. 3.
- Syauqi, D. (2004) *al-Mu'jam al-Wasit*. Al-Qahirah: Maktabah al-Syarq wa al-Dauliyyah.
- Zolkefali, M. Z. B., & Wahab, N. A. A. (2016). *Pemeriksaan peranan masjid di Malaysia era kontemporari*. e-Academia Journal, UiTM Press